

Der erst taylor.

¶ Das. xli. Capitel.

¶ Item was man die leng behalten wil von fischen vnnnd wiltpret, das muß man salzen vnnnd dören vnnnd trucken behalten. Also ist es auch ein gestalt vmb alles fleysch.

¶ Das. xlii. Capitel.

¶ Item frucht die man vber jar behalten mag zu kochen. Dür weygeln oder kirschen in dem Bachofen behalt sie in ein Kestkorb der da lufftig sey oben in einem hauss / wenn du jr bedarffst zu selzam in der fasten / oder zu andern zeyten so du es haben wilt / so leg sie in ein schöne schüssel / vnd geuß frisch prunnen wasser darauff / so kumen sie inn jr rechte alte krafft / die mag man für gest tragen / vnd siech leut damit erfrewen / Vnd allerley müser dauon machen / als vorn steet.

¶ Das. xliii. Capitel.

¶ Item wilt du Frenckisch weinber behalten / Nym ein hengel als da zehen oder zwölff trauben anhangen / mach ein gutten laymen dünn mit prunnen wasser in ein weyt schaf / vnd stoß die hengel dar ein / das sie nit vnten anrüren / vnd hencf sie in ein Keller / bis du jr bedarffst / der mach also vil oder wenig / vñ wenn du jr bedarffst zu selzamen zeyten / so fül ein schaf mit prunnen wasser / hencf sie darein als lang bis der kleyß erweicht vnnnd flöß in ab. Darnach begeuß sie mit andern frischem wasser schön / laß trucknen / vnd trag sie dann für.

¶ Das. xliiii. Capitel.

¶ Item sängen vber jar zubehalten / als korn oder weytzen. So nym sie in der grüne ab / so sie seng seind / vñ dör sie in einem Bachofen / oder an der Sonnen / behalt sie embor als die kirschen / vñ wenn du die haben wilt so leg sie in ein frisch prunnen wasser / sie kumen wider zu irer krafft / damit seud jung hünner / oder mach sie ab mit einem kleinen specklein vnd saltz / oder mit milch schmaltz. Auch seind die wild vögel gut darinn gesotten vnd dervig. Item durre Biren von allen geschlechten mag man also behalten.

¶ Das. xliiii. Capitel.

¶ Item von durren rußen vnd steckrußen die aller besten / so man jungen gereuchten brüling darunter seud / vnd mit milch schmaltz vnd saltz abgemacht / das ist gerecht.